



Malwg Gap Baengzyoux

小狗交朋友

Malwg riengz daxmeh ngamq daeujdaengz ranz bouxcawj. Gizneix miz haujlai baengzyoux iq, malwg angq dangqmaz. Daxmeh daengq de naeuz, itdingh caeuq gyoengq baengzyoux iq doxhuz doxndei.

Malwg yawjraen gyoengq gaeqlwg caez guhcaemz guh'angq, couh angq-vauvau buet gvaqbae, siengj caeuq gyoengqde guhcaemz, hoeng, gaeqmeh baez yawjraen de daeuj, couh swenj-goekgoek, gyoengq gaeqlwg couh sik-haek buet deuz lo!

Malwg saetmuengh dangqmaz, naj saepsaengsaeng daeuj caeuq daxmeh gangj: "Duzgaeq mbouj caeuq gou guhcaemz ne? Gou mbouj caiq caeuq gyoengqde doxndei lo!" Daxmeh nai de naeuz: "Lwg gvai gou ha, bouxlawz mbouj miz baengzyoux cix ndei ne? Itdingh caeuq gyoengq baengzyoux iq doxhuz doxndei cij-ndaej ha. Mwngz maj ndaej baenzneix hung, gyoengqde maj ndaej baenzneix

iq. Mwngz mbouj sing mbouj swt couh buet gvaqbae, gyoengqde haengjidingh laihnaeuz mwngz buet bae haepa gyoengqde, couh lau ndaej buet deuz lo. Baezlaeng miz gihvei, mwngz bang ndaej gyoengqde, gyoengqde couh gag saenq mwngz lo."

Ngoenzneix, malwg yawjraen gyoengq gaeqlwg, bitlwg guhdoihi guhcaemz guh'angq, de hozhaenz dangqmaz. Baezneix, de gvai lo, de menhmenh byaij gvaqbae, doiq gyoengq gaeqlwg, bitlwg naeuz: "Gaeq dahnuegx, bit daegnuengx, raeuz guh baengzyoux ndei ba." Gaeqmeh mbe fwed buetfafa gvaqdaej, simgip dwk hongz malwg naeuz: "Liz lwg gou gyae di!" Youh daengq gyoengq gaeqlwg bitlwg naeuz: "Duzde yaeuh sou, gaej saenq de!" Bitmeh hix hongz malwg naeuz: "Duzma couh dwg yakdoeg simgei lai, siengj yaeuh gyoengq lwg dou, vaiq deuz!"

Malwg naj nding dwk euq naeuz: "Gou dwg caensim caen' ei q caeuq daihgya guh baengzyoux bw, daxmeh

gou gangj seiz gaenjgip dou lij bang ndaej sou ne."

Gaeqmeh caeuq bitmeh dingq le nyaenx mbouj ndaej caezsing riu naeuz: "Duzma bang dou? Gaej haeb dou suenq ndei lo!"

Malwg doeknaiq raixcaix, youh dauqma cam daxmeh naeuz: "Gou dwg caensim caen' ei q ha, vihmaz gyoengqde mbouj saenq gou ne?" Daxmeh naeuz: "Mboujguenj mwngz geijlai caensim caen' ei q, caengz guh daengz, vunz cungj gojnaengz ngeiz mwngz. Gaej haeujsim gij vah neix, gaej doeknaiq. Saehsaed mbouj yungh euq, caj mwngz guh daengz le, gyoengqde couh saenq lo."

Ngoenz ndeu, daihgya cingq youq laj daengngoenz dak ndit, duz romh ndeu fwt coemj roengzdaej, coemj dawz duz gaeqlwg ndeu, siengj dawz bae gwn. Gyoengq gaeq bit cungj swenjsasa ndoj mbouj gib. Malwg daraeh, mbouj caj daxmeh de hemq, couh lumj diuznaq nei cung hwnjbae, aj bak couh haeb duzromh, hwk ndaej

duzromh vaiqvak mbeuj ndang baez bienq, bek fwed baez yat, ndek duz gaeqlwg deuzmingh bae lo.

Duz gaeqlwg ndaej gouq lo. Gaeqmeh daih'it boux buet gvaqdaej, de doq lox gaeqlwg doq docih malwg. Bitmeh hix gvaqdaej lo. Malwg angq dangqmaz, doiq songde naeuz: "Daxmeh gou naeuz, raeuz aeu guhdoihi doxhuz doxbang. Daihgya cuengqsim ba, miz gou caeuq daxmeh youq gizneix, baezlaeng couh mbouj lau bouxcaeg duzromh lo."

Daihgya cungj ciuz gvaqdaej lo, bouxboux cungj docih malwg gyaep duzromh deuz, sawj daihgya bingzan. Gaeqmeh caeuq bitmeh cungj nyinh-loek lo, songde haenh malwg naeuz: "Mwngz caen dwg boux baengzyoux ndei ndeu ha!"

Daj baezneix hwnj, malwg caeuq duzgaeq duzbit caencingq baenz baengzyoux ndei lo, gyoengqde ngoenzngoenz guhdoihi guhcaemz guh-angq, doxhuz doxbang, doxndei dangqmaz. (Ganh Sozvwz/甘说文)

Mwh cuengq hanzgyaj, gou bae ranzdaiq guhcaemz. Yawjraen daxdaiq ngoenzngoenz cungj youq ndaw ranz nyaengq guh hong-soujgoeng racienz, yienghneix baez ndaejhoengq, gou couh bang daxdaiq guh soujgoeng.

Ngamq hainduj, gou mbouj rox guh, roxnyinh guh gig dwgrengz. Daxdaiq couh baenz di baenz di son gou. Gou guh vaih lo, couh lid bae dauq guh. Guh mbouj daengz song ngoenz, fwngz gou gingqyienz hwnj bop lo, daxdaiq ngoenzngoenz cungj guh, yiengh-neix mbouj dwg engq sinhoj ha?

Faenh "Cienzhong" Daih'it 第一份“工资”

Gou baez daih'it roxdaengz vunzhung racienz caen mbouj yungz-heih. Yienghneix, gou nyaenx in, genhciz guh roengzbae.

Daengz mwh yaek haihag, gou yaek ma ranz lo. Daxdaiq hawj cienz hawj gou, gou baenzlawz cungj mbouj aeu. Daxdaiq naeuz: "Gij cienz neix dwg mwngz bang daxdaiq guhhong canh ndaej,

dwg 'cienzhong' mwngz, mwngz ndaej dawz bae cawx bitmaeg." Dingq daxdaiq baenzneix gangj, gou cieq aeu cienz lo.

Aen hanzgyaj neix gou ndaejdaengz faenh "cienzhong" daih'it ciuhvunz gou, hix roxdaengz racienz mbouj yungzheih.

(sam nienzgaep Ginh Vanjlanz)

sij cozvwz cingzgingi

Ndaw Godangz Geqnaeuz 课堂上的倾诉

"Ae!" Dangz Dahaij yungh genfwngz bungqbungq Liuz Yenz doengz daiz de, "Ngoenzneix dienheiq geijlai ndei, cei q hab dik giuz lo. Danghnaeuz dangz cozvwz sawj vunz gyaeujin neix vuenh baenz dangz diyyuz geijlai ndei ha! Daengzseiz gou haengjidingh angq lumj duzroeg gwnz faex nei." Liuz Yenz yawj de mbat he, naeuz: "Mwngz cij rox dik giu, mbouj cwtsik."

Dangz Dahaij da baez daengx, diuq hwnjdaej, naj nding dwk naeuz: "Dik giuz miz maz mbouj ndei, daengzcog gou itdingh haeuj Cungguk cuzgiuzdui bae, hawj cuzgiuz Cungguk byaij ok Yacouh, byaij coh seiqgyaiq."

Cwnz Cungh dingq le, bak

baez mbwnj, naeuz: "Loqraen."

Dangz Dahaij ngamq siengj caeuq de bueklwnh, deng Lij Cing lanz youq naeuz: "Gaej ceng lo, vaiq hwnj goq cozvwz ba."

Mbouj gangj cuzgiuz le, Dangz Dahaij doeknaiq lo, aen'gyaeuj duix roengz, yungh fwngz roqroq aen'gyaeuj naeuz: "Cozvwz, giz-neix dwg gyong ha." Daegcoengh aeu fwngz fuz aen nganxcuiq, lumj bouxgeq nei song fwngz cuengq baihlaeng, byaij bae byaij dauq, bibuengq aen'gyaeuj, menhmenh naeuz: "Aen'uk Dangz Dahaij mbouj dwg gyong, dwk saek haeuj aen cuzgiuz hung he, gij doxgaiq wnq couh mbouj miz dieg ndwn lo, hix nanzgvaiq de sij mbouj ok cozvwz ndei daeuj." Geij coenz



vah daeuj ndaej daihgya cungj riu lo.

"Mwngz naeuz, ngoenzngeix goq cozvwz, Yenz lauxsae hawj raeuz sij gijmaz ne?"

Cwnz Cungh cam hagsib vejyenz Cangh Hungzci. Cangh Hungzci cehda baez baenq: "Haengjidingh dwg bingzlwnh denyingj. Raeuz ngoenzlwenz mbouj dwg ngamq yawj denyingj 《Ciuh Yiluz》ha?" Mbatneix, ndaw gyausiz lumj ndaw rek caq youz nei, gyoengq doengzhag mwngz coenz gou coenz ngeixlwnh denyingj ngoenzlwenz yawj haenx.

(1)

Cuengqmbin 放飞



Miz ngoenz ndeu, daxgoeng youq ranzdajcawj gaeb ndaej duz roeg he, duz roeg neix cuengq haeuj ndaw roengq bae. Gou gueng raemx hawj duzroeg, duzroeg cungj mbouj gwn, itcig buekmingh daemj aenroengq, siengj deuz okbae.

Gvaq yaep he, duzroeg sawqmwh dakmai, song gaiq nyauj sukndaet youq doxcaez, aenda laep ndaet, song gaiq fwed duix roengz daejroengq. Daxgoeng naeuz: "Duzroeg heiqndat dai lo!" Daxmeh cix naeuz: "De dwg cang dai, siengj ndaejdaengz swyouz. Gou gamjdaengz duzroeg dwg baeg lo, siengj yietnaiq yaep ndeu.

Gou dawz aenroengq riuj daengz yangzdaiz bae, ndit ciuq daengz gwnz ndang duzroeg, gizgyae cienz daeuj sing roeg hemq, duzroeg ndaw roengq hai da lo. "Daxmeh duzroeg itdingh gig siengj de, danghnaeuz daxmeh ra mbouj raen mwngz, itdingh gip ndaej daej bae." Daxmeh youq henz rwz gou naeuz. "Dwg ha, danghnaeuz gou deng gven youq ndaw roengq, hix gig siengj daxmeh ha." Gou hai aen dourouengq, roeg iq bekbek fwed mbin bae lo.

(it nienzgaep Ouhyangz Siuhbingz)